



Nefndasvið Alþingis
Sigrún Helga Sigurjónsdóttir
Austurstræti 8-10
150 Reykjavík

Seltjarnarnesi, 30. júní 2010
2010050195/0.1.2/GG/L.SJ/gh

Efni: Umsögn um frumvarp til umferðalaga, þingskjal 943 – 553. mál

Landlæknir þakkar fyrir beiðni um umsögn um ofangreint frumvarp. Eins og fram kemur í 1. grein er markmið laganna að vernda líf og heilsu vegfarenda með auknu umferðaröryggi þar sem jafnræðis er gætt milli vegfarenda óháð samgöngumáta og tillit tekið til umhverfissjónarmiða við skipulagningu umferðar.

Í vandaðri lagasetningu á sviði umferðamála felast mikilvæg tækifæri til að minnka líkur á slysum og óhöppum í umferðinni og út frá sjónarmiðum lýðheilsu er fagnaðarefni að gefa heilsusamlegri ferðamátum, svo sem almenningsamgöngum og hjólreiðum, aukið vægi. Lækkuð viðmið um skilgreiningu á ölvunarakstri og sú nýlunda að veita heimildir til að hafa trúnaðarlækni við Umferðastofu og nýta þann farveg fyrir endurmat á aksturshæfni er farsælt skref enda miðast hvoru tveggja að því að styðja ökumenn til að meta færni sína til aksturs rétt.

Sértækar ábendingar landlæknis er varða frumvarpið sjálf eru eftirfarandi:

Í 45. grein um bann við ölvunarakstri er kveðið á um að rýmka gildissvið banns við ölvunarakstri. Er þar farin sama leið og Svíar og Norðmenn hafa þegar gert á þessu sviði. Margt mælir með því að lækka viðmiðunarmörkin fyrir vínandamagn í blóði ökumanns í 0,20%. Þar vegur þungt að ökumenn aka síður eftir neyslu áfengis vegna þess að þeir telji sig vera undir mörkum.

Í 48. grein er kveðið á um skyldur ökumanns vélknúins ökutækis til að gangast undir öndunarpróf og láta í té lífssýni.

Í eftirfarandi málsgrein –


Lögregla annast töku öndunar-, svita- og munnvatnssýnis. Læknir, hjúkrunarfræðingur eða lífeindafræðingur annast töku blóðsýnis og eftir atvikum munnvatns-, svita- og þvagsýnis. *Aðrar rannsóknir og klínískt mat skal framkvæmt af lækni eða hjúkrunarfræðing (leturbreyting landlæknis).*

Þar sem ekki liggur fyrir tæmandi lýsing á hvað getur átt við í upptalningunni *aðrar rannsóknir og klínískt mat* er ekki hægt að sjá annað en að það geti falið í sér t.d. mat á eitrunaráhrifum af völdum áfengis og/eða lyfja (með hliðsjón t.d. af vistun í fangageymslu) og/eða til að útiloka að það ástand sem er til staðar stafi af sjúkdómi en ekki áfengisneyslu eða lyfjum. Því er mælt með að þessi setning vísi til þess að aðrar rannsóknir og klínískt mat eins og hér er vísað til, sé á ábyrgð læknis.

Tillaga að breyttu orðalagi í 48. grein væri þá: ... *Aðrar rannsóknir og klínískt mat skal fara fram á ábyrgð læknis.*

Landlæknisembættið lýsir yfir stuðningi við frumvarpið, með þeim ábendingum um breytingar sem hér fylgja.

Virðingarfyllst,


Geir Gunnlaugsson
landlæknir